

理大藝術家聯盟召集人汪明荃博士
理大原創音樂劇開幕演出
致辭(廣東話)

各位嘉賓、老師、同學、校友：

大家好！今日我好高興以香港理工大學藝術家聯盟召集人嘅身份，出席理大原創音樂劇《時空「理」程》首演。我想藉呢個機會祝賀香港理工大學正名大學三十年，繼續推動學術、科研同埋藝術文化發展。

理大原創音樂劇《時空「理」程》係慶祝理大正名大學三十年嘅盛事，主要由學生、教職員同校友共同演出原創音樂劇，以藝術方式呈現理大嘅故事，意義重大。我好開心見到理大多年來努力推廣藝術文化，學生嘅理大裝備咗堅實嘅應用知識，加上文化藝術嘅內在修養，真係情理兼備。

自從1999年開始理大舉辦駐校藝術家計劃，二十多年來邀請咗無數藝術家同校方策劃藝術文化活動，培養理大師生校友嘅藝術鑑賞能力，提升校園嘅藝術氛圍。喺2020至2021年度嘅駐校藝術家計劃，我策劃咗一系列活動推廣粵劇文化，包括展覽、講座同互動環節，直接同一眾師生校友交流，傳遞粵劇嘅魅力，至今我仍然印象深刻。

理大喺2023年成立理大藝術家聯盟，我同多位歷任駐校藝術家以及本地知名藝術家攜手，一齊喺理大校園同社區推廣藝術同文化，提高學生、年青人嘅藝術文化素養。

過去，理大製作過好多唔同類型嘅藝術文化活動，而今次嘅音樂劇係首次原創製作。《時空「理」程》講述理大嘅發展，記錄理大人

嘅珍貴時刻及成長軌跡。我喺演員遴選、故事創作等方面都有參與。見到理大師生校友們嘅熱誠，同埋佢哋為今晚嘅演出而密集排練，我相信佢哋嘅努力同堅持，會令到呢場音樂劇得以精彩呈現。

最後，預祝今晚嘅演出圓滿成功，祝大家有一個愉快而難忘嘅夜晚。多謝大家！